

青蘿館詩集序

陳山人曰余以瑰異之士好道  
古述先王願世沿習卑不足揚  
國風而慙化恥其身淪胥以溺  
何當得一壺躍然於中流即千  
金未足多也踟躕四顧寧無蹇



裳共濟者乎夫自蘇李肇西京  
而曹子建輩翩跹下六朝以還  
李太白杜子美斐然有唐

國朝尚經術設科選士海內遵  
若周行而談藝者罕矣弘德時  
李獻吉何仲默相嘆大雅久已  
不作伊余其力追挽之天挺李  
于鱗王元美嘉靖中倡廓古風  
持鞭弭雄視中原徐子與前茅  
俊勁于鱗則謂吳越一叢土乃  
有二生與吾三分鼎立比肩千  
載豈非一盛事耶于時宗吳梁

謝翕然雨來而七子篇章灑  
朝省間矣子與在逢掖固已稱  
詩計偕道上詠鳴嚶懷同人扣  
舷而歌馮軾而吟何窅乎及仕  
比部邂逅李王同舍中其喜而  
後可知也乃歎此道雖千里而  
遙日斯于邁旦暮且遇之矣下  
帷覃思當筵灑翰教業樂羣不  
遺餘力居常其思深匪直在上  
國時雖萍梗散之四方離索一  
隅職司王事顧碣石在彼即案  
牘什伯紛如一息握管而揮之

矣何嘗不岍憤長謠興懷陳致  
有當乎心恨不縮地所親纒  
于左右也夙夜傲揚二三兄弟  
一日千里蓋人能矣而或先登  
則瞠乎其後曷以有詞于邁見  
乎故其所至探竒訪逸固無已  
時比以恤刑使者持節江南行  
部海陽枉車騎衡茅出示登臨  
題賦諸篇揚擢風雅定交以去  
然子與崛起東南藉甚有名時  
而省覲時而待次遊客過後日  
嘗滿坐為詩贈答益以蕃多于

鱗每見則推轂子與流傳方國  
贈灸士林倣以歲年超詣化境  
可俟英雄于異世也迺為次以  
成帙題曰青羅館詩集子壻汪  
時元余嘗介之學詩有季請而  
刻之以傳同好予觀當在任者  
騫進乘時競程書顧羈縻於好  
爵負俗好古沉酣鉛槧而勵翼  
不足以服官曉彼碣石游侶曹  
事弼諧孔力於藝林復尔雄飛  
無亦天授瑰異而俾其名長宙  
寰區者乎是以子與歷官治功

累稱高第况其詩炳煥編中古  
雅溫茂則若建安瑋麗雄奇則  
若開元君子散帙必歆賞其微  
音之琅也當知予言之非佞哉  
隆慶庚午秋八月六水山人陳  
有守撰



青蘿館詩序

嘉靖間余友徐子與以進士初  
官刑曹即有能詩聲故河南按  
察使濟南李攀龍山西按察使  
吳郡王世貞于時同官遂相砥  
礪聲益藉藉起矣處士臨淄謝

榛故福建按察副使廣陵宗臣  
為吏部主事荆楚吳國倫為給  
事中故刑部主事嶺南梁有譽  
皆隸京師屬附之各竭所長以  
出雋語故刑部尚書吳興顧公  
應祥甚有重望善鑒人倫以為  
數子者並足馳騁古人當世不  
能傳也數子者亦復知余子與  
後自刑曹按獄吳中特枉車騎  
歡猶平生禮出度外子與貌馭  
而氣和神逸而機清言辨而意  
舒愛博而仁至能令人出肺腑

而不自疑予謂子與於人將無  
不歡然交通也然耿介之操未  
嘗隨時訛毀之聲得於異已尋  
出守汀州復補汝寧守左遷長  
蘆轉湖廣按察僉事今為雲南  
叅議由是溯大江汎洞庭浮瀟  
沔出夜郎太華點蒼之竒峻昆  
明洱海之遐僻殊無隕葉冬有  
繁花絕地窮天之勝恒落於荒  
憬幽渺之區此惟懷才羈離之  
士能專而有之子與固是遂得  
徜徉寓其勝於詩以泄其情愆



難卒之思而往注每出於常言  
之外新都汪惟一師事子與嘗  
繕緝子與所為詩自初官以迄  
于今刪取若干首勒為六卷名  
青蘿館詩梓之而屬余為序惟  
子與知予知子與者亦莫過於  
余乃為之序曰夫道麗事而見  
事因時而行事不行則鬱於志  
志不達則昌於言言之昌者為  
文文之約者為詩詩固文之蘊  
也風雅頌者詩之名也興比賦  
者詩之體也非卓犖之才不足

以贍其體非玄解之會不足以  
究其才而子與之為詩清雄其  
暢穠潤秀逸遠有所託近有所  
懷興文成篇意無乏緒故知事  
適其變而言出於常理會於玄  
而才究其美昔詞英諸公若梁  
之任昉丘遲沈約吳均陳之沈  
炯唐之沈千運孟郊錢起並遞  
起吳興而子與乃生於千載之  
後誠能馳騁其間斯亦豪矣即  
數子者又曷以加諸因論次為  
序而顯其首子與名中行吳興

人

隆慶辛未歲七月吳郡俞允文  
撰



欽邑黃鑑刻

青蘿館詩集序

新都汪道昆著

余聞之作者曰有唐以詩鳴  
蓋本業也大曆而下不啻波  
流隆則隆汙則汙論其世可  
已當世以經術論士士顧能

詩

太祖始興草昧間作弘治則李  
獻吉何仲默副以徐昌穀諸  
曹超乘而前去輓近世千里  
矣嘉靖則李于鱗王元美徐  
子與而吳明卿宗子相參焉  
于鱗謂余吾黨亟稱獻吉恨  
不與諸君子同時不自意結  
伍從之取前茅以進幸也夫  
前者崛起後者代興百年之  
間駸駸進於大雅非適逢世  
能乎人言李何故相驩率以

名高為敵國乃子與嚴事于  
鱗元美直將尸而祝之二子  
周視中原亦首推轂子與子  
與朝明卿而夕子相率諤無  
面從退語其私則交相重也  
務以上人已愈下務以下人  
已愈尊由斯以談于鱗固非  
虛語世儒率以可視後死者  
將無與焉幸而在茲遂中睜  
眦於是于鱗引去元美以難  
去子相去而死明卿去而三  
從之子與晚得汝陽尋從去

此其故勿論已頃于鱗多子  
與日益則豈窮而工耶子與  
稱詩無慮數萬言籍而授門  
人梓什之一于鱗蓋嘗定之  
矣余受而卒業汝陽以後參  
居二焉自子與罷郡歸四方  
之屨滿戶客奉不給則貸入  
繼之窮矣顧其神益王其業  
益精其受益較著窮何病子  
與哉善隱者謂楚奉江潭為  
三閭湯沐其所奪者狹其所  
予者奢饗其利者以為有德

然則左輔夜郎皆食邑也寔  
世世饗之彼其退若隊淵終  
其身不召道喪世矣

今上即位遞起諸大夫于鱗入  
大梁元美入晉子與入楚當  
世以此勸士故得士彬彬則  
明德茂也獨明卿陸沉南海  
豈天意奉明卿耶子與又言  
楚人三試而賜執珪今及明  
卿矣

隆慶四年冬十月朔

青蘿館詩目錄

卷之一

五言古詩

題西園雅集卷

得于鱗書

五遊詩贈郭山人

懷李于鱗

懷王元美

懷吳明卿

春暮將赴汝南廣川舟中寄懷京邑遊好

三首

荅郭次甫

題萬言卿西原精舍二首



NATIONAL CENTRAL LIBRARY, TAIWAN, R.O.C.



送吳生遊楚

卷之二

七言古詩

贈湯邑博

送李于鱗守順德

送吳舍人明卿還楚

神樓篇爲大司空劉公賦

送張中丞還山曲四首

捕虎詞

高陽行送沈嘉則入閩

卷之三

五言律詩

三日同茂秦順甫元美遊姚園分韻

送郭侍御左遷永安令二首

苦雨

贈壺關李山人二首

力疾訪俞仲蔚夜酌

席上贈別吳明卿同諸子賦得心字

過顧汝和所遲黎惟敬不至得寒字

寄荅廣陵陸無從 祀陵

荅明卿

燕山除夕

秋日二首

哀商中丞

春日同順甫元美遊姚園

于鱗元美同日發借宗吳二生送之分賦  
吳給事謫豫章四首

慶陶邑會于鱗

郭黎梁三生再過客邸

出守後寄舊遊

山居得吳明卿再謫報

壬戌除夕對雪邀郭次甫同賦而余病忽  
作次甫遂去元日投詩見懷輒賦此奉  
荅并訂後會云

將赴汝南留別李伯承黎惟敬顧汝和汝  
所楊邦彥進士郭次甫山人得臺字

郭次甫顧汝和兄弟携酒韋寺園亭叙別  
三首  
衛河留別盛少尹

汝寧郡署坐嘯亭讀書作

暮發滁陽

罷郡後作二首

罷郡歸過吳門王元美兄弟同俞仲蔚彭  
孔嘉黃淳父周公瑕袁魯望史叔載張  
幼于載酒舟中賦二首

汝南罷歸山中作 除夕

閒居 山房讀書作

蘇君楫過飲青蘿館中席上賦

張子嘉過訪山中 贈別鄭山人

奉荅李于鱗二首 荅周真陽

汝南解郡入京飲戴錦衣園亭獻春吳邵

武嘗過此得東字

同袁魯望文壽承飲顧汝和雪舫得涼字

夏日同魯望楨伯汝和汝所道楨集國博

文壽承齋得涼字

立秋日重過魯望客舍得車字

即事志喜寄王元美兄弟

秋日署中二首 初度感懷

明卿守邵武五年不調忽有左遷賦此慰

之三首

贈四明董生善古篆隸印章

與元美方舟北上四首

挽太保劉安文公 客舍秋懷

寄題灌息軒

讌黃鶴樓賦得禰衡二首贈吳生虎臣

初入滇關二首

卷之四

七言律詩

除夕

九月八日登天津城樓遲謝山人李比部

賦

山陵道中風雨二首

卧病簡萬郎中章甫

答孫侍御秦中見懷之作

遊荆溪張公洞 送元美出塞

送于鱗還郡 李伯承諸子見過

韋園同于鱗子相元美席上賦二首

寄題李于鱗白雪樓二首

表臺同諸僚友燕集

同諸子登表臺作

送兵憲李公量移還豫章余亦被播歸吳  
興

別郡中諸鄉老先生

寄明卿

送表魯望上春官

送郴州曹文學之任瓊山

寄荅廣陵歐文學

題門生汪惟一筠丘卷

長至陳達甫携從子仲魚過集得旁字

解郡後寄懷李于鱗時先予乞歸七年

寄懷張中丞時余解郡還里

懷學憲尚公

秋日同王元美兄弟遊顧司寇西郊別墅

分得山吹二字是日招宴城居

荅朱邦憲

萊蕪令王君以誼誤還山元老招之北上

過訪山居席間賦贈

寄嶺南李僉憲 寄廣東馮大叅

送莫廷尉之任南都

魏濟南順甫數候于鱗意甚篤至因傾示  
詩草即爲刻播日久未寄賦此索之

同年陳憲使自臨海枉訊

承元美兄弟出金裝橐貽書促余北上賦  
此謝之

周真陽明府同歐廣陵文學餞余于張掖  
門時真陽亦以候調至

題戴衛尉講堂待直卷

都門送魏鴻臚還吳

長蘆署中獨酌奉懷王元美兄弟俞仲蔚  
及吳門舊遊

寄贈太常楊公遷銀臺

九日登蘆臺樓懷于鱗元美兄弟明卿諸  
君子二首

九日懷仲蔚

王仲房過訪將有十嶽之遊賦贈

山居故將軍曾子澄夜過談及邊事遂北

上賦贈

歲暮大梁道中寄懷京邑遊好

涇溪王使君見過投詩賦荅

題俞德卿江上小堂

邀鄭順甫避暑薜荔園有感舊遊

贈葉順甫

贈顧中翰汝和奉使祭告德衡三藩兼祠

沂山東海已事訪李于鱗山中

都門送門生顏日莊令博羅

慎子正侍御初度寄贈

寄懷張肖甫少叅廣西

夜泊秦郵風雨感懷子相

卷之五

七言律詩

夏日臨汀門人鄧景范過訪賦贈

沈嘉則沈維賢過訪分韻

寄徐使君督學楚中

寄汝南張助甫

吳志道往謁劉中丞於崇陽

送大中丞楊公之湖廣

寄荅王元美

荅元美

夏夜同汪惟一吳志道西湖對月

寄贈陸茂才時吳志道寓其廡下

西湖送別黃子秀茂才還豫章子秀乃長

興舊明府之子

寄荅黃子芳即子秀之弟

登峴山懷俞德音卧疾

奉荅豫章王孫子晦并簡同年余德卿

送姚惟貞方伯候調之京

喜于鱗起家浙憲二首

于鱗書徵元美及余爲文會于吳山意氣

豪甚輒賦二詩壯之

呈大中丞周公

有諷于鱗不宜起者輒爲解嘲二首

暮春汪惟一王世華孫從周夜集得紅字

春日同吳太僕周給事高刺史沈山人陪

李觀察西湖燕集得山字

陸郎中汝成讞獄閩中



南昌謝侍御屬同僚費君索贈爲賦

都門感舊

都門會于鱗

燕市送薛生薊鎮謁戚開府

飲濟南沈太史宅

同陳玉叔李元甫集李本寧宅時余將入

楚得之字

出關遇雪有懷元美

贈劉開府

追于鱗不及道遇元美賦此

同元美渡江喜鬻

過歐廣文首齋同元美賦

答元美戲爲一首

秋日諸君餞焦山作

渡淮大風簡元美

戚希仲楊伯章二禮部携酒夜過同于鱗

賦

九日抵京于鱗過飲懷元美魏郡

九日洪山寺登高懷于鱗明卿元美兄弟

汪伯玉中丞起撫鄖陽志喜二首

寄谷中丞開府浙江二首

曹大叅有卿自桂林入賀過宴赤壁同賦  
時已三捧表矣

王敬美自陪京禮部分司遷員外郎還朝  
武昌聞曹有卿自粵西擢浙臬寄贈  
李方伯黃憲使入賀

寄題芙蓉園

客部楊伯章擢大梁學憲寄贈二首  
何汝肅年兄超拜閩省中丞賦贈

丘宗伯邀顧大叅王侍御及余雪後登赤

壁作

贈楊仲甫擢武闈第一

年家陳玉叔廷評方子及刺史李元甫李

本寧二吉士方景武秀才過集得年字

訪于鱗至平原道中大風雪戲呈二首

贈舒城李少尹孫 題周象賢太霞卷

嶺南陳公叅政閩中

送長沙張少叅之蜀便道還吳

齊安雪中得仲晦王孫德甫觀察書并詩

却寄二首

歲晏懷元美

汪惟一刻余詩集請叙鄖臺汪公賦別兼  
簡達甫陳丈

貴陽蔡侍御元夕遲余燕集信宿賦謝

盤江驛舍阻雨寄門人汪惟一

觀察郭公餞別貴陽西關

過關索嶺醉後解嘲

卷之六

五言排律

正月十六夜同諸子過順甫宅得燈字

杪夏從瑞金山行輿中作兼寄明卿

送族姪徐雲卿任靈璧縣簿

出越劔示王亮卿席上口占

送大梁李公轉東藩左轄八韻代作

同張肖甫送迺兄張山人還蜀

七言排律

黃河道中別吳生

賦得貞石贈雲間吳比部十二韻

奉送太宰楊公西還誦德述懷十九韻  
五言絕句

活水池

詠顧汝和舍人種桃

題顧汝和石鼎寮

邛竹杖

七言絕句

燕臺感舊

停舟溪上懷子相

登霹靂巖遲宗少叅子相雷雨驟作

梁園送青州馮公督學浙江二首

送子相

送于鱗之邢州三首

送許趙州兼訊李邢州

送元美二首

同明卿惟敬登太白樓

感舊二首

懷于鱗

征南鏡歌二首

于鱗謝病濟南寄訊

寄荅汝南諸明府

寄贈侍御潘子良督學畿中二首

贈總制汝南喻公破胡鏡歌二首

戲詠盆中品字蓮二首

寄張亮卿林彥仲游明仲趙以忠四子

懷于鱗

懷明卿

寄在明

寄齊相許殿卿時于鱗病免濟上

送丁叅軍之楚幕二首

芙蓉峯

文筆峯

錦屏峯

曲溪

贈蘇進士歌者新春

華陽明月曲

送吳明卿

廣陵史德初訪余山中

挽中丞王丈三首

送司馬蔡公赴京四首

秋日建溪懷明卿 哭光祿汝所二首

爽臺送別朱生

六言詩

宜城贈包護軍

再贈包護軍

青蘿館詩目錄終

青蘿館詩卷之一

吳興徐中竹著 門人新都汪時元校刻

五言古詩

題西園集卷

西園美清夜置酒臨高樓涼飈散暄濁飛蓋聊  
行游芙蓉被幽渚好鳥鳴河洲皓皓鄴城月蕩  
漾清漳流衆星粲以繁冠佩列應劉玉盤膾神  
魚艷曲奏箜篌賢王重片善磬折恒相求文雅  
鬱縱橫賓主紛勸酬慶雲布優渥何言澤不周



俯視銅雀臺零落成荒丘觴至不盡歡良景逝  
不留載歌露未晞嘉會垂千秋

得于鱗書

伊予河梁別楊柳方依依分手幾何時蟋蟀鳴  
庭幃商飈率已厲白露沾人衣感時懷同袍中  
心愴以摧不惜故人遠但傷知音稀長嘆謝流  
俗高卧掩重關忽逢雲中翼開緘見音徽殷勤  
骨肉言夙昔歲寒期臨風再三讀慰我長渴飢  
喜極復垂涕願隨黃鵠飛

五遊詩贈郭山人

郭生抱靈異本自煙霞姿束髮愛遠遊所得皆  
經竒夙昔上太山爰值暮春時五藥既翕翹三  
芝亦歲莖排虛登日觀流覽臨四垂鷄鳴海色  
赭靈耀浴咸池滄溟僅一勺黃河細於絲縹緲  
三神山雲濤相蔽虧極睇金銀臺凌風欲從之  
道逢魯兩生時會于鱗殿  
鄉太山下示以東游詩杖策往  
勞山果得逢其師從此謝塵侶倏然駕雲螭  
余昔夢太華飈馭何泠然一舉歷千仞倏忽升

雲烟松下有異人彷彿呼子先指余金天精名  
署 玉帝前一朝挂塵網霞想未及宣我友歷  
下生逸氣臨高天躡足超滉漭竦身坐其巔千  
載一遐眺英聲振八埏君今嗣高步抗志凌飛  
仙手持盧敖杖遙訪丹丘筌紫氣亘高掌曠若  
相周旋閔尹倘再遇貽我西游篇

衡嶽何蜿蜒秀出楚雲重崔嵬赤帝宅合沓祝  
融峯璇臺倚空曲上與冥宿通朱陵闕日月紫  
蓋垂芙蓉禹時金玉檢石室今猶封仙宇紛星

羅羽客徃徃逢緬惟蔡使君坐嘯青霞中彩毫  
洒絕壁白晝飛長虹綿邈經廿載君復振玄風  
靈文授鳥字真氣開鴻濛安得從子去並起雙  
飛龍

螭坎井居斤鷄枋榆息不騁無涯覩安知九  
州窄君偶燕市逢已躡恒山屐眷余汗漫期滯  
爾扶搖翻夙駕今復行上下將安適誓登玄嶽  
顛極眺海天色絕頂摩層霄玉衡手堪摘俯視  
黃河流倒趨崑崙石始悟太玄泉可以鍊金液



緬昔昌容仙蟬蛻幾千億齋心倘逢之服食駐  
精魄獨徃當自茲毋令濛汜迫

維嵩鎮中天壯哉稱神岳二室閔陰陽三臺倚  
寥廓松栢翳叢霄金壁組丘壑榮光晻象緯絳  
氣互縈薄岩竇多神芝仙靈此栖托爍爍三花  
樹玄冬靡凋落石髓可代飡銅鈔有遺藥平生  
慕王喬結念在伊洛君從大梁來申以嵩高作  
詎意剖符地果遂凌雲諾伊余方外期寧恋區  
中樂乘風倘再過遲爾緱山鶴

### 懷李于鱗

寥寥獻吉後作者日以邈海內操觚家人人抱  
荆璞夫子一高視青天出華嶽遂令二三子廣  
路齊文轂郢人豈無斤妙在輪扁斲不有師涓  
悟寧聞鈞天樂自君歸泰山浮雲滿河朔亦有  
燕丹酒誰聆漸離筑神馬恋蛟龍竒禽宗鸞鷲  
况我同心侶分義踰骨肉引領一悲歌弦斷不  
可續誓當理初衣從君卧空谷

### 懷王元美

朔風吹薊門玄雲暗四野嚴霜白日冷哀鴻淚  
長夜起坐懷昔游荏苒半凋謝宗梁既長逝海  
內傷大雅王生雖僅存其憂甚死者慈母哭堂  
上弱弟哭堂下寧論嵇紹孤已見蓼莪罷豈不  
願速朽骨肉誰相藉且留如綫身隴上樹紛檟  
賴有揚馬才詞場足凌跨萬變渺端倪千秋獨  
悲吒我欲問巫咸何從借雲駕

懷吳明鄉

猗猗孤生桐托根南岳趾幸蒙風雲會移流  
華裏霜霰忽見侵摧頽心半死豈無清廟音疇  
爲製綠綺陽春徧八埏胡爲獨遺此感念懷密  
親躑躅向燕市斗酒味寧薄沉懽滯不起獨携  
郢中歌徘徊向誰理坐聽失群鴈嗷嗷慕儔侶  
宛轉不能寐空庭復徙倚朔風中夜吹浮雲日  
千里歲暮黃河水何由寄雙鯉

春暮將赴汝南廣川舟中寄懷京邑游好

三首

昔來嚴霜零春陽忽已暮盛年不丹逢嘉會豈

常遇何況凌雲才藝苑振高步眷余失群羽不  
吝千金碩留連曲水游感慨河梁賦嬾婉能幾  
時俯仰即岐路車馬盈道傍孰測心所慕莫闕  
何若荒浮雲日馳驚歛轡臨長河徘徊不能度

其二

浩浩黃河流冉冉白日晚驅車渺何之南游洛  
與宛五馬道踟躕十步一顧返言念同懷人亮  
節不可諉談天碣石宮置酒華陽館高文敷瓊  
瑤清歌命簫管携手遠追隨思情一何婉居者

弗克俱行者日以遠春暮無歸鴻何由寄情款

其三

黃河多悲風白日度川陰驚沙蔽天地方舟猶  
躑躅將安適曳履援鳴琴一爲清商曲灌  
木俱悲吟知音一以隔離思故難任在近多遺  
遠日月易浮沉伊余歲寒契莫忘初別心願言  
厲高羽千載垂詞林瑤華倘可嗣引領伊川尋

荅郭次甫

論文誠獨難知己良不易流俗多混淆物理失

真僞世無郢匠斤焉知斲輪秘余昔二三子幸  
遘風雲會和歌燕市中俠氣振天地經時倏星  
散斯文遂陵替策馬余北來耳目日以異緬想  
西園游悽惻山陽涕連枝旣以摧碩果亮終棄  
詎意飡霞人夙有凌雲契獨往慕鴻冥遠游學  
蟬蛻托興詞翰場四海一高睨跂予碣石宮遂  
停恒山轡立談未及終三嘆不能置金奏豈阮  
生郭公果心醉贈我歲寒枝貯之瓊瑤噐副以  
陽春篇殷勤表良遇感此欲報之幽懷靡可致

匣中有龍泉厩中有天駟佩以辟群邪驟以謁  
上帝汗漫八極間疇能測所至

題萬言卿西原精舍二首

矯矯豫章材瑋識一何朗蚤歲升當塗明堂振  
清響輝赫冠蓋間而獨秉高尚依依箕穎情寤  
寐發遐想九江湧坐隅匡廬出諸掌魚鳥宛來  
親煙霞日排蕩曾是青瑣居泠然白雲賞道勝  
貴陸沈天游謝塵網所以賢達人金門寄偃仰

其二

伊昔讀書園藹藹章江郭高齋俯江流崇臺面  
廬嶠佳氣何鬱盤川原莽迴薄丹霞射踈牖白  
雲蕩虛幕洒翰激神飈披襟坐遼廓卽今冠朝  
列故鄉日以邈長安十二衢飛薨麗朱曩含意  
益沈溟每飯在丘壑混跡豈殊衆忘筌會有托  
咄嗟曲士心精微疇能度

送吳生遊楚

江介多悲風庭草率已萎貧士久失職抱影西  
山陲負薪豈不苦披裘有良規落落吳季子夙  
稱東箭竒論文得吾黨金石誓不移送子涉遠  
道言訪瀟湘湄三楚富竒節眇眇成心知平生  
國士膽慷慨得所施楓林已搖落江水何逶迤  
情深氣逾烈贈以猛虎詞雖非季布諾聊用惠  
前綏

青蘿館詩卷之一

青蘿館詩卷之二

吳興徐中行著

門人新都汪時元校刻

七言古詩

贈湯邑博

君不見魯申公受詩浮丘號儒宗抗直仍辭楚  
王傅杜門教授蓬蒿中豈謂明堂待高議安車  
駟馬來山東又不見匡說詩微言纒纒解人頤  
公車屢上不稱意遠方隨牒猶低眉翁然經術  
動三輔一語尊爲帝者師湯君緼藉亦如此

牢落風塵難獨窺九重上書未得見兩都作賦  
空稱竒去年掄材向三蜀司馬工楊盡有之問  
竒且醉子雲酒抱膝自歌梁甫詩祇今清聲漸  
藉藉群公交口惠前綏薦賢會入山公啓摘藻  
應逢秘監知有道自諳龍蟻理雲霄九萬未云  
遲

送李于鱗守順德

去春從君燕市遊眼中諸子同杯酒今春送君  
河梁上爾我躊躇自携手大雅沈淪况已久吾  
黨相逢非信偶乾坤反覆賢豪至百年麟鳳生  
郊藪孝宗作者李與何力挽江河始東走君  
也蚤得哲匠心玄夜昭回開北斗睥睨城邊  
代人招携復得同心友竭來陸沉郎署中玉石  
蒼茫竟誰剖王生披覩自青年謝客陰森回白  
首余之同袍梁與宗感會風雲成不朽嘯侶頻  
過碣石宮善譚清懽何不有席上揮毫烟霧飛  
燈前擊劔風雷吼嗒嘖雄辯謝雕龍等閑世事  
同芻狗嗟哉此意人知否世路風塵莽荆棘相

知歲月遠南北塞帷君遂守扶風執戟余猶滯  
京國酒殘日落君當行且復斯須岐路側纏綿  
奇樹本連枝婉娈鷓雛分比翼龍劍精靈雖共  
存瑤琴神理終誰識平生知己自君盡別後何  
人寫胸臆趙地曾誇三輔豪意氣環竒自疇昔  
士慕平原有處囊予懷鉅鹿無終食卧閣春風  
鼓瑟聲行軒明月連城色秋日如逢壁使來報  
書慰我長相憶

送吳舍人明卿還楚

楚詞何者振芳躅前有屈平後宋玉眼底吳生  
亦崛起早歲天衢策高足結交羞問聲利場染  
翰慙看聾聵俗夙昔逢予盡省中握手慙勲賞  
清曲心知此物識者稀意氣飛揚自相勗倏忽  
赤水探玄珠凌厲青霄起黃鵠江河百折獨往  
心富貴浮雲非所欲逶迤洪響滿雲臺載酒依  
依坐天祿自許東方暫陸沉豈如左史徒能讀  
俠氣還爭山嶽高壯心不爲軒裳東海內賢豪  
幸一時過逢但坐邀擊筑碣石談天盡古今華



陽置酒窮曛旭淹留復似小山招跌蕩爭爲大  
言賦劇飲惟愁白日過窮交不畏黃金妬早覺  
吳生肝膽露倚劒茫茫紛四顧仰天爲我歌楚  
歌千里烟雲低不度登臺朔漠來秋色七陵莽  
蒼開烟霧乾坤此會真有神世路艱危轉自親  
朝廷若可無揚馬符瑞寧須待鳳麟片言自昔  
重山嶽九錫徒爾輕埃塵鄉不見章華冠蓋委  
草莽郢中詞賦懸星辰鄉今乘槎漢水濱鄂渚  
涼風萬里新愁入湘沅飛暮雨氣生雲夢起  
嶮岫鸚鵡洲荒悲處士懷沙地古吊詞臣詞臣自  
昔擅陽春含意千秋鬱未申宋玉祗今逢和者  
靈均莫嘆國無人

神樓篇爲大司空劉公賦

斥鷃游枋榆逍遙在尋丈醢鷄生甕中何由覩  
天壤曲士勞勞一世間白首風塵空偃仰明公  
托宿自神樓傲睨浮雲轉高敞九州不足步四  
溟不入眼脫畧小區寰局促悲世網寓意神樓  
十二重振衣千仞懷獨往太虛爲宇天爲梯上

通鴻濛下塊漭照室宵懸罔象珠排虛日射金  
銀榜黃鶴南度嘯月明紫氣東來開天象乘霧  
壺中汗漫游御風方外冷然賞玄覽還同弘景  
登金丹况遇安期餉吞腥啄腐咲世人冲樓福  
地何瀟爽公昔芳年叩帝闈一旦雲臺振洪  
響揮翰高凌揚馬前許身直擬夔龍上世路喜  
浮沉中懷轉跌蕩經綸未究早拂衣身也可退  
道難枉祗今大隱八十春瀕洞乾坤幾反掌公  
也風神益高朗上乘真窺鴻寶書後車久謝鷹  
揚訪羨門王喬可等期芝草琅玕日夜長念我  
曾蒙國士知從公擬稅塵途鞅介壽慙無雜佩  
貽回首神樓發遐想

送張中丞還山曲四首

風雷一夜摧西嶽千里塵飛渭河濁但卧南山  
自堪樂咲殺漢代飛將軍猶把侯封問王朔  
四旬已稅長安轂萬事不問君平卜且醉山中  
酒千斛不見君家漢子房朝封留侯暮辟穀  
長劔重淵斬巨鰲樓船萬里截風濤兵權脫手

如鴻毛王濬無功何足問叔子歸第何其高  
憶昔張翠淮海傍立談贈我雙干將三年萬里  
隨行裝聞君別離忽躍去星斗錯落無晶光

捕虎詞

湖邊野人何太武赤手山中搏兩虎卞莊之術  
何足數安得一騎疾於風鼓行而西擊胡虜

高陽行送沈嘉則入閩

自從酒人散燕市予亦拂衣歸五湖四明沈生  
忽相過投謁自稱高陽徒夙昔詞場騁高步里  
耳紛紛曾不顧玉簡真探禹穴書金聲未數天  
台賦平生所得皆經竒歷落崑崙少見知夷門  
一顧仍寂寞肝膽熒熒好向誰千金自詫屠龍  
技削緹不掩干霄氣琴心欲締千秋賞劔術曾  
令萬夫廢獻春一走姑蘇道王家兄弟盡傾倒  
酒酣贈爾遊閩篇矯矯雙虹破秋昊武夷之山  
昔所經海日照耀千峯青瑤流九曲挂南斗巖  
壑徃徃藏仙靈中有賢豪稱大度客但南遊豁  
雲霧中丞折節魏信陵飛將干城漢都護任俠

青蘿館詩卷之二  
從來未可輕伏軾旋收七十城劇孟隱然一強  
國鄙其自許非狂生袖中漉漫一敝刺留向明  
卿結知己十口甘從吾黨貧寸心忍向風塵死  
九歌倘就堪招魂百鍊誰將化繞指高陽徒沈  
夫子擊筑送君萬山紫盧敖杖王喬履贈君五  
遊從此始

青蘿館詩卷之二

蘇館詩卷之三

吳興徐中行著

門人新都汪時元校刻

五言律詩

三日同茂秦順甫元美遊姚園分韻

春疑溱洧地人似永和年  
往事名賢得清狂我輩  
偏水邊尊並綠竹下語  
同玄此日王夷甫寧將  
樂令傳

送郭侍御左遷永安令二首

何意乘驄客蒼茫出禁廬  
名高折檻後恩重賜

青溪集詩八卷三  
環餘白日少公事青山把道書從來慢亭上時  
有謫仙居

悲秋予更劇謫宦爾何之赤縣須君輩蒼生異  
昔時 主恩無遠近國事有安危惆悵延平路  
應裁古劍詩

苦雨

幾年烽火急三伏鬱重陰日夜疑天漏  
陸沈未能超苦海空欲賦愁霖窮人  
然金石音

贈壺關李山人二首

箕穎逢高士山川未寂寥河流迴上黨秋色近  
中條綠綺幽蘭操青尊叢桂招更聞秦女在雲  
外坐吹簫

何處堪高卧秋雲萬壑中初衣裁薛荔古榻覆  
梧桐招隱淮南子懷仙河上公冥鴻宿昔意寧  
復世人同

力疾訪俞仲蔚夜酌

白首交初定清尊病不辭烽烟誰下榻天地此

論詩解帶南風入，閑簾北斗垂。從來五岳意，今與向平期。

席上贈別吳明卿同諸子賦得心字

新知爭授簡，舊侶柰抽簪。自古騷人賦，于今國士心。仙舟江月上，客夢楚雲深。搖落秋相憶，中霄鴻鴈音。

過顧汝和所運黎惟敬不至得寒字

朝市幾人在，風塵晤難郢。歌逢客少燕，月到春寒露。氣高金掌花，陰轉玉盤不知清。

向碧雲看

寄峇廣陵陸無從

廣陵人已沒，絕調爾能傳。氣壓觀濤賦，名高入洛年。投珠滄海曲，擁樹大江邊。倘憶山陰客，還乘雪夜船。

祀陵

展祀逢寒食，登臨起暮愁。陰霾屯虎豹，春雨濕松楸。燭影千官靜，泉聲萬壑幽。行宮雲縹緲，應爲翠華留。

荅明卿

旅館銜杯日詞場問鼎年昔游曾後乘一別竟  
先鞭身豈風塵失盟應海岳懸當時有長劍依  
舊倚胡天

燕山除夕

舊游曾此地除夕况堪悲棄置天難問文章老  
自知中原纔一遇吾道竟群疑正有山陽感誰  
教玉笛吹

秋日二首

迢遞懷親舍棲遲念此身百年當自得孤憤竟  
誰陳白首存知己黃金閱世人扁舟定早晚湖  
上一垂綸

風霜物候改歲月客心驚高卧仍違俗深藏轉  
畏名滄洲連夕夢白髮逼秋生不是同懷者誰  
憐留滯情

哀商中丞

將相未交驩烽煙漫築壇至今憂左衽何處失  
南冠雨泣蒼梧晚風吹易水寒唯餘龍劍氣長



向獄中看

春日同順甫元美游姚園

落魄憐吾黨流光憶去年  
狂歌銷白日醉眼望青天  
詞賦非時好漁樵自舊緣  
試看芸閣吏何似竹林眠

于鱗元美同日發偕宗吳二生送之分賦  
萬里知難駐千秋豈更親  
劔分留紫氣杯盡失青春  
三署傾詩客中原散酒人  
勿令歌變徵風雨易傷神

吳給事謫豫章四首

乾坤震蕩後雨雪豫章行  
與世安微祿投荒就大名  
青山飛瀑色白日走江聲  
若過柴桑里堪從漉酒生

此日何天問當年已陸沉  
罪寧懷白璧權合讓黃金  
縱改滄桑色難摧海嶽心  
湘纍靈尚在千載見知音

淮陽漢揖客澤畔楚詞臣  
霄漢寧容汝江湖且寄身  
寒濤千里雪落日九江春  
試掃匡廬石青

天賦隱淪

綠鬢三湘客青楓八月濤未湏傷積羽總不廢  
持螯把劍星文動攤書嶽色高非君能放逐不  
復見離騷

廬陶邑會于鱗

高齋淹下榻雨色暗荒城濁酒千秋事綈袍一  
日情側身看世態握手失時名從此三江上悠  
悠好濯纓

郭黎梁三生再過客邸

白社踈狂客青門雨雪天邀歡忘歲晚得句覺  
春偏別易成今古交難論後先高陽即此地莫  
問酒壚邊

出守後寄舊游

白雪吾何有青雲向未爭祗銜國士意遂被黨  
人名星斗紛搖落山川亦震驚因思河朔飲一  
語未堪輕

山居得明卿再謫報

去國猶三黜懷沙更九歌賜環知爾在按劍柰

人何朋舊飄零盡年華涕淚過倘憐愁病者一  
爲訪煙蘿

壬戌除夕對雪邀郭次甫同賦而余病忽  
作次甫遂去元日接詩見懷輒賦此奉荅  
并訂後會云

燕市逢春雪梁園憶惠連南州原下榻剡水竟  
迴船詩草懷同病梅花照獨眠還期攀玉樹共  
賦郢中篇

將赴汝南留別李伯承黎惟敬顧汝和文  
所楊邦彥進士郭次甫山人得臺字

薊門芳草徧惜別更登臺河嶽天中路衣冠鄴  
下才白雲停攬轡黃鳥送行杯况是銷魂處燕  
歌且莫催

郭次甫顧汝和兄弟携酒常寺園亭叙別  
三首

偶携梁苑客同訪給園春鳥下窺征蓋僧來問  
故人驚心楊柳亂刺眼杏花新盤石清谿上曾  
經把釣綸

萃髮重游日青春欲別時池閒鷗鷺浴亭古薜  
蘿垂試暖衣初換尋芳席更移蒼苔片石在猶  
見昔年詩

聽法曾蕭寺投簪復漢關花驚新白髮酒憶舊  
青山萬態胡僧老孤亭野鶴閒獨憐河曲侶雲  
散幾時還

衛河留別盛少尹

不斷風沙色扁舟且未迴送余臨汝水念爾滯  
燕臺把臂春陰合開尊暮雨來慚非孔北海誰  
薦孝章才

汝寧郡署坐嘯亭讀書作

徑僻青蘿合亭空白日長癖難忘左氏狂頗似  
東方身漸風塵老名差案牘強平生喜坐嘯不  
是學南陽

暮發滁陽

荒城一騎出落日萬峯西澗水流人影松陰散  
馬蹄懸厓青欲滴芳草綠堪迷洵美非吾土翻  
然憶故谿

罷郡後作二首

頃已厭承明今歸遂耦耕鴻冥幽客意徂喜衆  
人情簿領工何補文章老未成拂衣從此去日  
月任縱橫

十載思丘壑今朝得杖藜挂冠嵩嶽頂鼓枻五  
湖西芳草春將徧桃花路不迷吳興清遠地不  
讓武陵谿

罷郡歸過吳門王元美兄弟同俞仲蔚彭  
孔嘉黃淳父周公瑕袁魯望史叔載張幼

于載酒舟中賦二首

青門纔解組白社便投簪竹帛功名薄江湖意  
氣深浮雲停坐嘯秋水照披襟何似執珪者空  
勞越客吟

歲月空招隱乾坤此定居裁衣新薜荔結伴舊  
樵漁節俠要離傳風流逸少書高秋倘乘興莫  
惜醉吾廬

汝南罷歸山中作

是歲春仲汝南西平縣  
產麒麟于農家被杖死

官聯下鳳邠身退獲麟年夕稅汝南騎朝耕箬

下田溪深藏日月地僻謝風煙閉戶還何事焚  
香草太玄

除夕

隱几當除夕聞鐘悟息機草玄雙彩筆垂白幾  
斑衣丘壑心難改風塵事總非何如一杯酒歲  
歲奉慈闈

閒居

于時羞白髮招隱愜青山久負冥鴻意非緣倦  
鳥還挂冠全傲骨戲綵慰慈顏詎似侯嬴輩栖  
栖老抱關

山房讀書作

任俠黃金盡文章白髮侵仕非無寸祿老自惜  
分陰萬卷成高卧千秋見苦心寄言鐘鼎客且  
莫咲山林

蘇君楫過飲青蘿館中席上賦

秋已過籬菊人誰到薜蘿倒衣逢上客把酒卽  
高歌狂態窮逾甚新詩病轉多始知寥廓士不  
厭住巖阿

張子嘉過訪山中

四壁相如在扁舟張翰來愁深詩總廢客至酒  
還開竹色清書愧桐陰覆石臺登高應有賦蕭  
瑟正悲哉

贈別鄭山人

不辭三顧數仍向五湖來孤棹風濤湧青尊雨  
雪開山川成我病詞賦見君才爲說中原侶乾  
坤更可哀

奉荅李于鱗二首

軒冕終違性滄洲自夙心病原宜偃蹇老益厭  
浮沉削跡天逾遠懷賢日轉深蓬蒿三徑裡高  
駕幾時尋

閉戶春將暮開書病欲瘳片言誰可就吾黨自  
相求海嶽窮何礙文章老未休何時載尊酒重  
上李膺舟

荅周真陽

半年三遣使茂宰念何深敝帚文章事縹袍故  
舊心世情原變幻吾道豈浮沉一任嘲玄草桓

譚自賞音

汝南解郡入京飲戴錦衣園亭獻春吳邵  
武嘗過此得東字

傳書二室後把袂五陵東不問官何拙翻奇賦  
轉工空亭原却暑喬木自生風却憶懷沙客燕  
歌恨未同

同袁魯望文壽承飲顧汝和雪舫得涼字  
雪舫塵俱絕冰盤夏轉涼樹交連理密花送合  
歡香寥落新知少參差故態狂河山寧復問且  
醉酒人旁

夏日同魯望楨伯汝和汝所道禎集國博  
文壽承齋得涼字

賓筵是河朔酒伴復高陽冰色侵紈扇雲陰度  
羽觴苜盤秋欲動槐市午逾涼落日催歸騎蟬  
聲滿建章

立秋日重過魯望客舍得車字

雨後過燕市秋先到客居驚心一葉下搔首二  
毛餘綠酒寧辭數青雲已自踈如何漢方朔猶



復待公車

即事志喜寄王元美兄弟

向欲俱浮海今堪獨戴天據關無虎豹閱世有  
桑田三尺寧阿貴千金不駐年應思齧人日曾  
是避豪賢

秋日署中二首

下車無一事卧閣但經時故態持螯見何曹問  
馬知海雲深坐嘯秋色滿題詩安得淮南侶同  
援青桂枝

有地容高枕無才愧抱關秋風吹渤海客夢滿  
青山垂老身何往浮生計總閒尊鱸今正好不  
及季鷹還

初度感懷

客裏生虛度山中願已違江湖鄉夢遠風雨宦  
情微衰鬢驅塵事浮名負薜衣平生多酒過不  
敢謂知非

明卿守邵武五年不調忽有左遷賦此慰  
之三首

頗怪除書晚，翻歸謫籍中。  
龍淵誰爲賞，魚服竟相蒙。  
引晦人猶忌，逢時路轉窮。  
沈冥本自意，宦術總難工。

客屢驚投杼，官猶共典籤。  
一嫌叔夜傲，誰問伯夷廉。  
藝苑何奇進，塵途合久淹。  
夔龍與屈宋，今古幾人兼。

聖主方前席，孤臣復左遷。  
疑生不調後，妬自入朝年。  
白雪終歸楚，黃金莫問燕。  
山堂舊時榻，早已爲君縣。

### 陵上作

風雨從西極，河山自北辰。  
林喧萬馬夕，花暗七陵春。  
慘淡弓刀泣，趨陪劍履新。  
文園卽此地，誰復漢詞臣。

### 卧病簡于鱗明卿

交游歸欲盡，滄海意仍違。  
豈羨鱸魚繪，長懷薜荔衣。  
人應嗤宦拙，我已貴知希。  
起看西山雪，悠然憶翠微。

### 荅明卿

燕市驚重見悲歌白日陰乾坤名轉大烽火病  
逾深萬事猶存舌千秋未折心豈應吾黨外別  
自有知音

山居作三首

鷹隼翻韜日魚龍脫網時人應嗟放逐我自戴  
恩私萬事莊生夢千秋楚客辭倘能齊物理翻  
恠罷官遲

其二

故人俱棄我田碩果久知盡寒灰寧

復然掩關天目雨把釣五湖烟  
愼惜雙龍劍休教犯斗邊

其三

卧閣身仍病抽簪氣始豪  
雄飛吾有在殺翻爾徒勞  
揮翰千秋失閑尊五岳高  
此時嵇叔夜真自感山濤

簡子相

故國同千里新愁總二毛  
豈緣微祿累應爲太玄勞  
雲月清瑤瑟風塵暗寶刀  
知君有起色堪

賦廣陵濤

同明卿飲胡司農山亭

仙署藏丘壑空亭挂薜蘿捲簾松露滴岬幘竹  
風多河朔它時酒高唐此日歌還同漆園吏芳  
樹倚婆娑

宗考功出補閩藩寄此

朋知行已盡孤尚轉難安幸爾辭羅網讎哉縱  
羽翰振衣秋色遠挂席海天寬九曲飛流處從  
君載酒看

贈四明董生善古篆隸印章

系出廣川後書探禹穴中字鐫堪泣鬼斤運忽  
成風繁露原家學雕蟲總國工問奇空爾意予  
豈似揚雄

與元美方舟北上四首

昔游非不數此遇更相親千里俱秋色扁舟但  
故人時時狂態出夜夜月華新何似平原客過  
途僅一旬

擊楫將安適方舟且滯淫千山窺染翰片月照

披襟衰髻羞連壁窮交喜斷金試看車馬地何  
物抵知音

長河雙繫纜落日萬垂楊白髮諳予病清尊益  
爾狂橐鞬欣再遇旗鼓敢相當坐覺雙鈞色縱  
橫北斗傍

不盡同舟興居然御李心僊才會不異酒態向  
予深月送秋濤色雲生大海陰乞休君倘遂吾  
意亦抽簪

挽太保劉文安公

更生推諫疏公幹擅詞雄一旦遺書出千秋汗  
簡同河山猶晉問郊廟自唐風復有懷君處翩  
翩禪草工

客舍秋懷

昔賢何落落而我尚栖栖老大羞牛後支離咲  
馬蹄軒裳徒自苦杯酒定誰携秋至仍多病那  
能待執圭

寄題灌息軒

滄洲原少事白日自深居夢破蘧廬後春廻抱

甕餘江雲窺隱几山鳥過繙書除却草玄外焚  
香只晏如

讌黃鶴樓賦得禰衡二首贈吳生虎臣

每懷鸚鵡賦千古氣難平江漲洲長沒春來草  
不生題詩驚跋扈縱酒喜縱橫試問樓中客何  
人似禰衡

我自三秋至雲今萬里開氣如吞夢澤風忽起  
蘭臺大別爲詩案長江作酒杯咲呼禰豎子狂  
簡未能裁

初入滇關二首

蒼然平楚望云是古滇疆白日開南徼青天豁  
大荒河山猶內地花柳自殊方吹盡浮雲色雄  
風萬里長

一出夜郎道纔看曉日生風聲連海壯地勢入  
滇平氣色開金馬烟花滿石城寄言張博望此  
去可橫行

青蘿館詩卷之三



國家圖書館, NATIONAL CENTRAL LIBRARY, TAIWAN, R.O.C.

三民主義圖書館

青蘿館詩卷之四

吳興徐中行著

門人新都汪時元校刻

七言律詩

除夕示元美

春生薊苑雪仍飛日逐荆卿醉不歸  
朋舊星疎長自惜天涯歲暮轉相依  
論文總抱千秋恨薄宦頻驚萬事非  
舊業五湖君最近可能携手賦漁磯

九月八日登天津城樓遲謝山人李比部



賦

搖落千山客思哀  
城樓面面海雲開  
漁陽秋色三邊盡  
碣石悲風萬里來  
南北烽烟聊對酒  
古今懷抱此登臺  
明朝更有龍山約  
羗笛胡笳莫漫催

山陵道中風雨二首

春日幽州黯不開  
蒼茫寒色徧燕臺  
乍驚芒碭蛟龍過  
復似崑崙風雨來  
地坼黃河愁震蕩  
天迴青嶂鬱崔嵬  
憑陵却憶狂胡日  
烽火高秋鼓

角哀

鼎湖曉散千峯雨  
黍谷春開萬壑冰  
閣道陰森盤樹杪  
宮墻繞繚隔雲層  
東來海色迷玄菟  
西望烽烟暗白登  
忽憶高皇歌猛士  
大風蕭瑟起諸陵

卧病簡萬郎中章甫

朝回伏枕望金莖  
中夜懷人玉漏清  
已分楊雄疲執戟  
如何嚴助厭承明  
艱危世路青尊盡  
搖落風塵白髮生  
不調未須嗟宦拙  
漢臣郎署自

垂名

荅孫侍御秦中見懷之作

千里緘書報漢曹  
新傳使節在臨洮  
西通大宛飛黃入  
北上蕭關太白高  
沙苑春深饒苜蓿  
栢臺秋晚醉葡萄  
誰知侍從回中後  
更有詞臣賦綵毫

遊荆溪張公洞

迢遙復岫倚高天  
百折危梯入紫烟  
赤日洞門吹積雪  
青雲樹杪挂飛泉  
潮生壑底三江應  
霞起壺中五嶽懸  
一自張仙冲舉後  
黃金大藥有誰傳

送元美出塞

柳色春深五鳳城  
明光使者授長纓  
風雲六傳從天下  
鼓角千山出塞行  
豐劍晝摧恒嶽色  
郅歌秋折大河聲  
何人爲掃燕然石  
萬古寧留爾輩名

送于鱗還郡

計吏雄才寵漢官  
還驚五馬出長安  
壚頭春入

燕山色七首風生易水寒三輔黃金 明主問  
千秋白雪世人看太行不厭高齋客橫笛休吹  
行路難

李伯承諸子見過

病客都門卧寂寥群公何意問綈袍風塵賴浹  
開雙眼湖海憐余改二毛落日五陵寒擊筑浮  
雲萬里過持螯酒闌共指談天處北斗遙連碣  
石高

葦園同于鱗子相元美席上賦二首

鶯聲歷亂柳花飛載酒名園興不違時序祇今  
嗟鬢髮天涯且復恋芳菲風生杜若香浮席雨  
過松蘿翠滴衣休沐更期旬日醉它時或恐舊  
游非

青蘿白石擁崔嵬芳草寒泉檻外迴四海交遊  
頻對酒千秋詞賦此登臺雷鳴忽訝蛟龍過日  
落重驚風雨催南北烽煙堪涕淚漢庭誰是請  
纓才

寄題李于鱗白雪樓二首

寥廓誰論碣石宮千秋作者此樓中自非海嶽  
開天造安得文章有國工撫軫陽春迴黯淡揮  
毫寒色散鴻濛杜門莫怪常高卧郢調人間未  
易同

駘蕩深知宋玉才層樓高倚岱宗開月含雙掌  
雲邊出濤擁三山海上來梁苑賦成誰授簡郢  
中歌罷自銜杯側身東望飛揚甚乘興焉能信  
宿迴

表臺同諸僚友燕集

表臺高出頰儒林叅佐乘春此盍簪自得范滂  
唯畫諾不妨羊祜數登臨嵩山近接真人氣汝  
水深知傲吏心倒著接離從客笑使君今已二  
毛侵

同諸子登表臺作

測景中天出表臺乘春四望曉雲開城臨縣瓠  
黃河落簾捲嵩高紫氣來寥廓星辰搖汝穎昭  
回詞賦列鄒枚風流莫問襄陽碣潦倒聊傾北  
海杯

送兵憲李公量移還豫章余亦被播歸吳興

向愁華髮願多違何幸青山遂拂衣一榻晝縣  
徐穉去扁舟春送李膺歸垂綸震澤歌明月載  
酒廬山賦采薇爲報海鷗休浪訝風塵回首久  
忘機

別郡中諸鄉老先生

汝南車騎滿河梁折柳重停五驪驪星聚暫能  
陪父老月評終自負循良開尊何處逢三益桂  
席明朝是兩鄉念我好游同叔子莫將遺愛比  
襄陽

寄明卿

忽傳燕使到平輿不是除書是謗書杯酒片言  
終不解雲霄累薦竟成虛即看吾黨俱漂泊安  
得狂生歎晏如坐待秋風吹九曲便乘明月問  
三閭

送袁魯望上春官

匹馬蕭蕭向帝州北風吹雪滿貂裘棄繻自許

終逢主抱璧何妨晚拜侯  
夜月銜杯燕市裏春雲載筆鳳池頭  
相思南望薜蘿綠定有鴻書問舊游

送郴州曹文學之任瓊山

炎州六月片帆孤楚客離歌颯五湖  
鄴下才名推大雅關西經術起文儒  
天連滄海風濤壯地隔中原氣候殊  
報主即今多國士充庭寧用薦明珠

寄荅廣陵歐文學

歐南海人

蕪城客夢滿江臯千里懷人尺素勞  
篋裏夜光南海月賦中秋色廣陵濤  
談天寧復如燕市翫世何妨似馬曹  
念爾最憐中散調知音寥落好誰操

題門生汪惟一筠丘卷

便娟脩竹滿靈丘竹裏煙霞澹不流  
總爲七賢留對酒非關千畝擬封侯  
月明嶰谷清音度風起瀟湘白日秋  
贈爾慚無枚叟賦兔園雲色未應愁

長至陳達甫携從子仲魚過集得旁字

漢宮僊律動初陽吳市悲歌入醉鄉憶昔雲霄  
曾獻履于今風雨各沾裳交游漸與青山厚辭  
賦頻驚白髮長明發登臺望雲物德星猶聚五  
湖旁

解郡後寄懷李于鱗時先予乞歸七年矣  
東山高卧已多時念我新貽招隱詩白首第應  
知己惜青雲寧免衆人疑縱橫詞翰千秋事汗  
漫江湖五嶽期從此泛舟雖未晚拂衣終自愧  
鷓夷

寄懷張中丞時余解郡還里

閒居鸞鶴久爲群薄宦金魚也自焚飄泊共成  
浮海客艱危猶憶伏波軍論心明月蘇臺冷翹  
首青天益部分誰信東山高卧後至今西北有  
浮雲

懷學憲尚公

憶昔雲間竝使旌相逢意氣更縱橫三江風浪  
尊前出二室煙霞賦裡生歲月異鄉難會面乾

言嘉會詩  
卷四  
坤同病易關情周游五嶽當年約此日堪隨向  
子平

秋日同王元美兄弟游顧司寇西郊別墅  
分得山吹二字是日招宴城居

僊臺寥廓白雲間謝傳歸來此閉關斗下著書  
深紫氣窻中飛瀑滿青山薜蘿秋老堪裁服松  
栢年多好駐顏不是主人開閣待高天日落詎  
能還

城臨箬水路逶迤樓敞天風萬里吹招隱偶依  
青桂樹銜恩猶憶白雲司秋高嵐翠沾衣袂日  
午松陰覆酒卮總是陳思門下客還期明月共  
追隨

荅朱邦憲

當年持節下長安裘馬逢君意氣看濟水春雲  
頻倚棹酒樓斜日共憑欄朱絃歲月相知少萃  
髮江湖一會難誰道子猷乘興後菰城雪色至  
今寒

萊蕪令王君以詿誤還山元老招之北上



過訪山居席間賦贈

高天何意落雙鳧爲問閒居到五湖主聖會應  
封即墨官貧且莫笑萊蕪塵埃氣色存龍劍丘  
壑襟期對玉壺聞道平津開閣待肯容滄海著  
潛夫

寄嶺南李僉憲

一別承明阻舊歡乘驄君復出長安天南氣色  
高銅柱日下聲名壯鐵冠霜肅炎荒春瘴盡月  
明滄海夜珠寒共嗟嶺外翔鴻少欲寄琅玕道  
路難

寄廣東馮大叅

向傳繡斧渡瀟湘重綰銀章擁大荒開府蒼梧  
推馬援論兵漢署憶馮唐荔枝入夏連薇省翡  
翠乘春貢越裳共道撫綏多遠畧遙看兵氣淨  
扶桑

送莫廷尉之任南都

繡斧風塵十載勞寵行新賜漢官袍廣陵濤白  
仙帆遠建業山青法署高氣色兩都桓典馬功

名萬里呂虔刀六朝芳草猶堪賦翰苑爭傳舊  
綵毫

魏濟南順甫數候于鱗意甚篤至因傾示  
詩草即爲刻播日久未寄賦此索之

梅花千樹照江臯春到何人共濁醪擁篲西河  
名轉大振衣東嶽興逾豪玄經總爲桓譚出白  
雪偏宜楚客操業已殺青猶未寄洛陽紙價故  
應高

同年陳憲使自臨海枉訊

曾勞尺素問懷沙病起茅堂感歲華驄馬乍廻  
滄海日彩毫猶帶赤城霞天中嶽色浮公署湖  
上波光滿客槎自昔陳徐共游好春風幾醉上  
林花

承元美兄弟出金裝橐貽書促余北上賦  
此謝之

故人藻翰頻相促傲吏金魚竟罷焚已道窮交  
惟鮑叔寧知資用有蘇君馬牽足練吳門色劍  
贈雙鈞北斗文三獻倘能明白璧千秋不忝附

青雲

周真陽明府同歐廣陵文學餞余于張掖門時真陽亦以候調至

遷客驅車出帝鄉幾人携酒上河梁名齊李杜  
寧辭黨飲逐荆高不厭狂秋色似應憐去住浮  
雲何自識行藏風流莫謂漂零盡紫氣猶寒北  
斗傍

題戴衛尉講堂待直卷

崇賢新闢傍楓宸調護仍分宿衛臣在昔虎賁  
稱學術于今鶴禁綴儒紳聽經東觀花陰靜托  
乘西園月色新更道從龍來郢里好因授簡和  
陽春

都門送魏鴻臚還吳

乍看通籍在蓬萊拂袖仍辭駿馬臺秋色自高  
張翰興一官誰盡魏舒才銜杯茂苑青山出挂  
席維揚明月來回首五湖情不淺悔將書劍老  
塵埃

長蘆署中獨酌奉懷王元美兄弟俞仲蔚

及吳門舊游

蕭齋無事日垂簾飄泊何知吏隱兼猶憶  
主恩分虎竹敢辭宦跡混魚鹽南皮詞客堪誰  
向北海清尊只自拈舊杜五湖秋正好未歸空  
復羨陶潛

寄贈太常楊公遷銀臺

昔督學楚中

向嘲寂寞子雲居今見銀臺傍禁廬出納舊傳  
周內史風流不數晉中書四方計吏趨金馬三  
楚門生在石渠更道身親雲夢事可知詞賦似  
相如

九日登蘆臺樓懷于鱗元美兄弟明卿諸  
君子二首

秋高葭菼大河迴病起層樓雨色開滄海白雲  
陪下榻中原落日見停杯一官已負陶潛興九  
辯誰憐宋玉才因憶吾儕燕市裏每逢佳節便  
登臺

孤城搖落氣悲哉斥鹵黃花也自開萬里鄉心  
隨去雁九河秋色起登臺自憐蓬鬢風塵老猶

憶黃囊漢署來此日銜杯誰不念飄零天地轉  
堪哀

九日懷仲蔚

黃花秋發映綈袍鴻鴈天迴首重搔搔落三江  
空望遠風煙萬里獨登高悔將薄宦驅衰鬢判  
取流年付濁醪却咲薰葭官舍滿何如仲蔚卧  
蓬蒿

王仲房過訪將有十嶽之游賦贈

抱病滄洲總陸沉掩關朱夏謝招尋雄風忽擁  
談天客大暑寧侵出世心翠篠影含冰簟冷青  
蓮香貯玉壺深振衣從此周名嶽誰道襟期負  
向禽

山居故將軍曾子澄夜過談及邊事遂北  
上賦贈

歲闌廷尉日張羅夜半將軍叱騎過別後幾人  
論白雪興來千里渡黃河燈前看劍驚風雨石  
上開尊醉薜蘿此去長纓如繫虜相思遙望寄  
鏡歌

歲暮大梁道中寄懷京邑遊好

寒色蕭條汝水濱  
檐帷猶復走風塵  
梁園賦雪逢多病  
碣石談天更幾人  
二室采花今已暮  
五陵芳草又將春  
近來憔悴君休問  
華髮于今已自新

涇溪王使君見過投詩賦荅

雲霄侍從憶僊班  
湖海飄零又賜環  
執戟頻年仍綠鬢  
褰帷到處有青山  
風塵萬事悲歌裏  
杯酒千秋睥睨間  
更羨郢中曾扈蹕  
祗今白雪滿

江關

題俞德卿江上小堂

寂寂茅堂傍水開  
青青芳杜繞簷迴  
白鴛白雪堪遺世  
寧論青雲未盡才  
萬里冥鴻過伏枕  
九江秋色對啣杯  
懷予定下南州榻  
安得扁舟一夕來

邀鄭順甫避暑薜荔園有感舊游

華髮談經有鄭公也  
從竒字識楊雄  
林深載酒銷長夏  
天敞登臺賦大風  
移席清陰生薜荔  
挂

衣明月滿梧桐因思河朔曾吾黨日日飛觴碣  
石宮

贈葉順甫

五湖秋晚忽相尋猶有陵陽淚滿襟躍馬向嗤  
唐舉相好龍猶負葉公心銜杯一日窮愁盡擊  
筑千秋俠氣深便欲贈君燕七首不禁風色起  
蕭森

贈顧中翰汝和奉使祭告德衡三藩蕪祠

沂山東海已事訪李于鱗山中

三齊帶礪壯 皇居六傳飛揚薄孟諸滄海觀  
風吳季札詞臣奉使漢相如金銀忽動蓬萊色  
科斗親窺魯殿書鳳沼倘逢兄弟問龍門曾御  
李膺車

都門送門生顏日莊令博羅

雪晴銀漢出仙槎天轉羅浮萬里賒候我西來  
占紫氣送君南去問丹砂彩毫却勝機中錦霞  
色爭如縣裏花自許延津龍劍在相知應不負  
張華

慎子正侍御初度寄贈

子正以漳浦令高第徵拜南臺抗論要人旋中以令事解職

挂冠寥廓一沉冥  
欹枕雲霞照獨醒  
彊項縱堪蒙漢法  
批鱗終自重朝廷  
殿中䟽草含霜色  
海上桃花識歲星  
咲看滄桑更欲盡  
森森臺栢至今青

寄懷張肖甫少叅廣西

中原一自起彈冠  
南徙仍從萬里看  
地擁銅標新岳牧  
天迴金馬舊祠官  
紫薇玉樹春相媚  
白雪明珠夜並寒  
虛道四愁君更切  
那無一字報琅玕

夜泊秦郵風雨感懷子相

驩呼當日共登臺  
風雨寧知此夕哀  
雪涕乍裁懷舊賦  
驚濤驟逐故人來  
千秋日月空淮海  
何處文章更楚材  
相憶詎須重挂劍  
斗間龍氣自徘徊

北郊卧病不赴齋  
宿屬元美諸人並移病  
因賦



仙臺玉漏霽沈沈遙望金莖祗自吟司馬文園  
長病肺漢皇宣室正齋心高城過雨疑秋早閒  
館焚香坐夜深何事故人俱伏枕虐傳載筆賦  
汾陰

射陽湖逢子相北上醉別

邂逅長安舊酒徒張燈夜醉射陽湖斗間劒氣  
雙龍合江上濤聲萬馬趨病起適逢牧叔作狂  
來重入步兵厨明朝挂席還南北回首長淮月

色孤

喜于鱗至

咫尺關門紫氣層溽泥千騎踏寒氷褰帷雪色  
迴雙闕擊筑春星動五陵肝膽詎從詞賦見聲  
名或藉璽書增亦知元禮龍門迴却恠當年醉  
裏登

元日簡黎惟敬

天涯回首跡俱陳雲物長安歲自新托興梁園  
唯我在倚歌燕市更誰親風塵一病生華髮劒  
佩連朝隔紫宸吾黨漂零君自見相逢寧惜賦



陽春

三才圖會

青蘿館詩卷之五

吳興徐中行著

門人新都汪時元校刻

七言律詩

夏日臨汀門人鄧景范過訪賦贈

冒暑南來路幾千  
談經只自感當年  
天涯一別過垂白  
門下誰爲守太玄  
懸橐故知廉吏後  
着鞭寧許衆人先  
賈生十載猶縫掖  
肯信吳公解薦賢

沈嘉則沈維賢過訪分韻

日上蕭齋破積陰尊開爽氣散青林文章不盡  
孤臣淚天地誰憐俠客心興至片言飛白雪交  
深千古失黃金祗今薜荔堪雲卧却悔衣冠久  
陸沉

寄徐使君督學楚中

五花驄馬氣何豪三楚青山照錦袍羽獵向誇  
雲夢大文章今並郢中高旋收和璧登清廟肯  
使隋珠隱漢臯 聖主賜環恩不淺門生慎勿

賦離騷

寄汝南張助甫

薇省遙臨衡嶽開漢京重起洛陽才洞庭雨過  
君山出郢里天高王氣來羽獵秋驕雲夢澤旂  
常春遠集靈臺况逢 今上飛龍處平子三都  
賦好裁

吳志道往謁劉中丞於崇陽

樓船組練照中原玉節金貂荷主恩一自流言  
歸馬援至今清嘯憶劉琨陣圖落日空魚腹耕  
鑿青山滿鹿門聞道杖藜招隱士還應倒屣見

王孫

送大中丞楊公之湖廣

誰借夔龍出漢宮  
興都根本兩京同  
提封萬井開雲夢  
王氣千山護郢中  
擁帳向曾傳白雪  
論兵忽自起雄風  
太平禪草須公筆  
聖主齋居問祝融

寄荅王元美

春風揮涕鬢俱蒼  
別路相看一水長  
念我秋來逾黯淡  
知君病後轉飛揚  
畏人不復題鸚鵡  
好客猶堪典鷓鴣  
已辦小舟同泛濫  
五湖煙月漫相將

荅敬美

自爾春歸薜荔深  
孤城秋卧晝陰陰  
書來姜被差無恙  
夢破潘輿轉不禁  
多病漸銷浮白態  
窮愁猶負草玄心  
蕭條四壁堪誰問  
但得君家二仲尋

夏夜同汪惟一吳志道西湖對月

千山雨後片雲無  
一棹風前興不孤  
入座詞人

高北斗開尊明月滿西湖光依玉樹秋相媚寒  
照冰心病欲蘇此地夜遊經幾度未知何客得  
驪珠

寄贈陸茂才時吳志道寓其廡下

披襟曾共賦雄風酒後縱橫思轉工洛下名流  
推小陸舍中高士得梁鴻西湖日月狂歌裏北  
海交游醉眼中爭道張華能識汝即看雙劍氣  
成虹

西湖送別黃子秀茂才還豫章子秀乃

興舊明府之子

落日河山萬里空扁舟尊酒故人同久從知己  
懷任昉忽自通家見孔融賦別西湖三伏雨還  
鄉秋色九江楓思親誰與黃香似贈爾齊紈扇  
晚風

寄荅黃子芳即子秀之弟

君家小謝興何豪春盡池塘夢轉勞千里忽傳  
鴻鴈字九霄如見鳳皇毛江雲飄泊隨孤棹湖  
月徘徊照濁醪龍劍十年猶未合豐城紫氣爲

誰高

登峴山懷俞德音卧疾

登臨忽自悵離群猶幸山陽笛可聞已爲倦游  
辭武騎邛堪多病擁文君停杯日落菰城雨伏  
枕春過震澤雲賴有觀濤能起汝還期握管待  
秋分

奉荅豫章王孫子晦并簡同年余德卿

文采翩翩帝子鄉獨憐多病罷游梁湘潭誰薦  
騷人賦蘭佩遙授大國香萬里青楓秋自老孤  
城紫氣夜相望因君更憶淮南侶愁見山中樹  
樹長

送姚惟貞方伯候調之京

紫閣經年夢十頻東山一卧轉逡巡九衢避馬  
風霜舊三殿飛龍日月新星自江湖臨帝座  
斑仍方嶽觀王春祗今國是清如水汲黯終爲  
社稷臣

喜于鱗起家浙憲二首

青門祖帳故賢哉冊詔新從海岱開闔闔萬年

真主出風雲一日卧龍來中興堪借文章色漢  
柱曾題侍從才最幸探竒司馬後逢君重上禹  
王臺

衣冠朝散未央鍾鞭弭中原豈易逢忽自東方  
驅駟馬遂令南斗合雙龍霞標欲避天台賦紫  
氣仍來日觀峯何但故人忻御李風流誰不慕  
詞宗

于鱗書徵元美及余爲文會于吳山意氣  
豪甚輒賦二詩壯之

龍門高倚浙江邊海內賢豪大會年詞賦有盟  
歸掌握縶鞅何地不周旋縱橫南紀星辰動氣  
色中興日月懸萬態盡銷吾黨在狂歌還似薊  
門前

禹壇文會遠相同不讓談天碣石宮授簡中原  
高白雪披襟大海起雄風重來五嶽神逾王老  
去千秋計轉工却咲未和脩禊者虛將翰墨擅  
江東

呈大中丞周公



再起中原屬望新授簪會復負平津風雲未盡  
文章色日月仍扶社稷身虛左至今慚國士居  
東誰不念孤臣興來欲泛山陰棹脩禊于今正  
暮春

有諷于鱗不宜起者輒爲解嘲二首

詔書三聘舊儒臣端委清朝表縉紳帝座客星  
高自若天門紫氣望逾新已知詞賦關當世何  
必行藏異古人金馬陸沉君自見仙才終不濕  
風塵

巖居歲月避人深無柰聲名動上林班馬故應  
增漢色巢由原未達堯心崢嶸白雪仍天地舒  
卷浮雲自古今楚客未須歌鳳德一朝千仞竟  
難尋

莫春汪惟一王世羣孫從周夜集得紅字  
春星乍聚雪溪東氣色何如碣石宮風雨故人  
經歲隔湖山今夜一尊同煙中叢桂新浮綠燈  
外殘花欲墮紅自是諸君耽寂寞敢云詞賦似  
楊雄

春日同吳太僕周給事高刺史沈山人陪  
李觀察西湖燕集得山字

千秋曼倩在人間十日平原未擬還  
授簡江南傳白雪開尊雨後出青山  
舊知鄉里詞華客半是雲霄供奉班  
望氣異時緣太史文星今夜滿

吳關

陸郎中汝成讞獄閩中

脫柯盧二子囚  
遂遷蜀憲副

漢節初持郎署年青驄遙憶寵行邊  
憐才義釋雲中守叱馭風生劍外天  
西望使星巫峽轉  
開憲府錦城連烽烟謾草征蠻檄  
父老還傳論蜀篇

南昌謝侍御屬同僚費君索贈爲賦

客有雲霄意氣看邀予相贈碧琅玕  
何須下榻知徐穉已自園棊識謝安  
驄馬曉從三殿出虬峯秋映九江寒  
崢嶸各有如龍劍咫尺猶憐會合難

都門感舊

自去吳山賦采薇重來魏闕淚沾衣  
握蘭畫省

知何歲種柳金城已十圍朝下鳴珂新月滿市  
中擊筑舊游非因思侍從茸泉日幾度花前並  
馬歸

都門會于鱗

相將沮溺老田間携手那知並賜環銅狄似猶  
諳歲月酒壚終不邈河山關門方軌來真氣  
帝座雙星照客顏當宁倘詢東觀事敢云楊馬  
在朝班

燕市送薛生薊鎮謁戚開府

咲傾杯酒辭燕市遠逐轅門問虎牙魏幕正妝  
飛檄士薛公猶隱賣漿家一毛池上元稱鳳五  
色毫端并作花會見勒勲遼海上未論秦代有

瑯琊

飲濟南沈太史宅

詞林競和郢中歌此日招携坐薜蘿碣石崢嶸  
鄒衍在華陽寥落慶卿過街杯海月窺金馬染  
翰宮雲駐玉珂醉後試論千古事黃金白雪定  
誰多

同陳玉叔李元甫集李本寧宅時余將入

楚得之字玉叔本寧楚人元甫蜀人

十載詞場又一時單車晏歲復何之通家就我能同調名世從它各有師楚客並栽鸚鵡賦錦江誰擅碧雞詞預愁入郢知音隔莫訝臨岐駟馬遲

出關遇雪有懷元美

孤臣建節指瀟湘瑞雪隨雲出帝鄉色動連城疑入楚光含照乘憶遊梁二毛銀艾寒相媚雙掌金莖夜自望極目扶風三百里興來誰見子猷狂

贈劉開府

威名一起渡瀘年每戰常當士卒先坐嘯清風劉越石縱橫南徼馬文淵樓船再淨三江色幕府高臨百越天聞道君王方北顧擬將名姓勒燕然

追于鱗不及道遇元美賦此

同舟向自期元禮乘興還能逐子猷萬事易從

交臂失千秋難得比肩遊倚歌霄漢雙星動悵  
望關門紫氣浮倘過平原俱會合何妨十日爲  
淹留

同元美渡江喜霽

新秋霽色滿江關容與方舟杜若間擊楫自憐  
過白首開尊猶喜對青山海中樓閣晴堪盡水  
面鷗鳧晚更閒親友亦知前路穩中流分手醉  
歌還

過歐廣文首菴齋同元美賦

首菴齋清海月縣桂枝新發早秋天小山自喜  
留詞客微祿猶堪給酒錢雙劍竝緣歐冶出孤  
棊曾是廣陵傳相逢片語能蠲疾不俟觀濤已  
霍然

荅元美戲爲一首

龍性由來不易馴斲更魚服混風塵彈冠海內  
誰吾黨結襪庭中自古人名在未妨嘲小草年  
過寧復問前薪縱饒邊幅稱桃梗敢向詞林作  
主臣

秋日諸君餞焦山作

破浪扁舟興轉饒  
馮虛杯酒坐煙霄  
秋陰曉散千帆雨  
海色晴連萬里潮  
半壁樓臺藏窅窅  
中天日月避岧峩  
青山况有焦君宅  
白社它年可待招

渡淮大風簡元美

蕭條無處可登臺  
試取寒濤對酒杯  
噓氣何勞驚日月  
排空忽自壯風雷  
乍疑神劍延津出  
復似飛雲芒碭來  
解道浮淮俱有賦  
千秋誰竝仲

宣才

戚希仲楊伯章二禮部携酒夜過同于鱗賦

三謁承明且未迴  
十年詩社此新開  
携尊黃菊重陽後  
竝馬青雲二妙來  
潦倒繆曾題漢柱  
文章終似起燕臺  
省郎星聚元非客  
太史明朝莫漫猜

九日抵京于鱗過飲懷元美魏郡

秋風幾日到長楊  
濁酒新開漢苑旁  
燕市十年

還二子龍山何處更重陽佩萸遙憶先朝賜落  
帽深諳故態狂躍馬獨憐三輔客登高頻望白  
雲鄉

九日洪山寺登高懷于鱗明卿元美兄弟  
寶地黃花已自開倦游詞客此登臺秋高落木  
千江下天濶寒雲七澤來入楚漸成莊鳥病浮  
湘虛愧馬遷才遙知兄弟持螯處念我還停濁  
酒杯

汪伯玉中丞起撫鄖陽志喜二首

歸來推轂動巖廊六傳依然鎮帝鄉記室半傾  
天下士戈船親繫日南王登樓明月三湘滿倚  
劔雄風萬里長開府試論文與武秣今誰似杜  
當陽

有客西來擁萬靈蒼茫七澤避文星共知白雪  
雄江漢誰見鈞天震洞庭結佩幾經春草綠寨  
帷依舊峴山青自憐幕下詞盟在不向長沙賦  
獨醒

寄谷中丞開府浙江二首

含香畫省憶同時白誓紅顏照玉墀烽火三持  
滄海節聲名一起縉雲司江濤驟湧放生筆海  
月閒窺謝傅碁念我湘潭尚畱滯虛傳龍劍有  
雄雌

請纓年少漢終軍直諫名高谷子雲緩帶九邊  
無勁敵折衝千里有奇勲公卿盡許屯田奏父  
老爭傳諭蜀文每念兩朝恩遇厚誓將重譯報  
明君

曹大叅有卿自桂林入賀過宴赤壁同賦

時已三捧表矣

楚國江山此鬱盤故人杯酒借交驩停雲遙帶  
蒼梧色賦雪高臨赤壁寒戀闕肝腸三表上驚  
心容鬢兩朝看爭誇獻壽重光曲才子何人似  
建安

王敬美自陪京禮部分司遷員外郎還朝  
六朝詞賦起揮毫八月仙帆揭海濤王氏才名  
推小令漢家禮樂屬東曹搏風雲路雙鴻影就  
日天池一鳳毛爾去代興燕市裏酒人誰復似



荆高

武昌聞曹有卿自粵西擢浙臬寄贈  
并序  
有卿自比部其先公自御史竝分巡越中  
至今父老猶誦慕云

褰帷忽自九疑來憲府遙臨禹穴開銅柱至今  
望海嶠霞標依舊挿天台江南盡識青驄步鄴  
下誰當繡虎才咲問吳興登峴首何如山簡習  
池廻

李方伯黃憲使入賀

橫江彩鷁照芙蓉魏闕千山望裏重獻歲明堂  
開萬國青雲方嶽起雙龍中興爭效東封頌舊  
侶仍聞長樂鍾不佞周南尚留滯心隨漢水一  
朝宗

寄題芙蓉園

芙蓉南國舊名池公子西園又一時不獨朱華  
同鄴下更兼麗藻似陳思青天露湛金莖掌淥  
水風含玉樹枝遙憶清秋明月夜幾人飛蓋共  
追隨

客部楊伯章擢大梁學憲寄贈二首

尊公太宰常督學山東許殿卿方任周長  
史而不佞亦嘗守汝南故篇中竝及之

仙班暫輟建章宮寵命新乘碧玉驄家學千年  
楊伯起朝儀一代叔孫通書探太室浮真氣詩  
采成周播國風更道平臺枚叟在梁園授簡可  
能同

趨庭近憶泰山東寥廓談天碣石宮世業向傳  
楊氏雀風流誰似鮑家驄褰帷少室三花上飛  
蓋西園明月中汝穎向稱星聚處賢材應與士  
鄉同

何汝肅年兄超拜閩省中丞賦贈

廿年驄馬外臺臣一日非熊入夢新肅駕雄風  
迴七澤褰帷紫氣動延津人從去後思何武帝  
爲南中借寇恂自許折衝吾黨事知君不慕畫  
麒麟

丘宗伯邀顧大叅王侍御及余雪後登赤  
壁作

鳴珂舊接五雲班  
醜酒平臨七澤間  
霞落高天銜赤壁  
雪晴隔岸出青山  
狂來意氣堪橫槩  
老去風塵更賜環  
不是蘇公能放逐  
誰將二賦壯江關

贈楊仲甫擢武關第一

關西世業遠相同  
上將桓桓出上公  
龍種一鳴空冀北  
鳳毛連起照河東  
論兵細柳旌旗肅  
奏賦長楊羽獵工  
共喜蟬聯霄漢裡  
屏風隔坐建章宮

年家陳王叔廷評  
方子及刺史李元甫  
李本寧二吉士方景武秀才過集得年字

天涯病起復遊燕  
歲晚通家意氣偏  
上苑星從今夜聚  
西山月爲故人圓  
彈冠白首慚先達  
載筆青雲羨少年  
屈指秋曹踰一紀  
詞林猶說郢中篇

訪于鱗至平原道中大風雪戲呈二首

塞帷落日望齊東  
咲指袁安晏卧中  
興劇非關乘夜雪  
神揚忽自起雄風  
雲低泰岳龍門迥  
天

入中原郢調工試問南樓搖落後當壚杯酒好  
誰同

傲吏深居萬壑中誰從霄漢報飛鴻臨關未有  
浮真氣邀客何勞起大風賦雪梁園新漢節談  
天碣石舊齊宮停車一就平原飲坐覺人間萬  
事空

贈舒城李少尹孫

并序

舒城李少尹廉吏也徃任長興與余善比  
過舒城訪之少尹墓木已拱而其子若孫  
並寄食婦翁家族人不收也余徧索得其  
孫玄吉乃解橐中敝緜貽之并賦一律用  
存窮交云爾

楚尹荒阡空復春王孫寄食向風塵負薪我自  
高廉吏分宅誰堪報故人物色已隨江水盡世  
情旋逐歲華新緜袍敢擬千金贈無奈冰囊也  
自貧

題周象賢太霞卷

霞標萬里落天台洞府遙從絕域開赤水珠光

蒸日月朱陵雲色吐樓臺總緣勾漏丹砂出曾  
見函關紫氣來不有雙鳧占太史誰知葉令是  
仙才

嶺南陳公叅政閩中

載筆先朝侍從官乘驄司隸舊長安月將滄海  
珠南入天與僊人掌上看渭水晴搖清禁曙華  
山秋映紫微寒更聞飛檄曾降虜不必親登大  
將壇

送長沙張少叅之蜀便道還吳

東征且莫戀葦蕘遇主長沙異賈生江月秋  
懸青翰舫使星春度錦官城天連劔閣題銘駐  
地入邛邰叱馭行試問蜀中諸父老文章誰並  
長卿名

齊安雪中得仲晦王孫德甫觀察書并詩  
却寄二首

二子才名鄴下齊尺書朝發豫章西斗間龍氣  
寒相傍江上鴻音雪不迷古調雙投青玉案山  
翁一醉白銅鞮不禁此夜飛揚甚清興泠然到

剡溪

歌成招隱雪仍飛千里緘書夢不違篋裡雙珠  
來氣色郢中連璧讓光輝青山一日詩名大萃  
髮三湘宦業微久欲從君歸白社已將蘿薜製  
初衣

歲晏懷元美

吳興亦有峴山

雙星並駐大江旁一水相看衣帶長我自洞庭  
懷震澤君從峴首問襄陽驚濤八月枚生賦白  
雪千秋帝子鄉楚國芙蓉寒更好不妨歲晚集  
爲裳

汪惟一刻余詩集請叙鄖臺汪公賦別兼  
簡達甫陳丈

郢中裘馬一周旋歲晚江湖意氣偏賦就繆勞  
皇甫序樽開猶媿子雲玄豈無勲業逢天幸惟  
有文章不浪傳况爾丈人今水鑒莫將下走廁  
前賢

貴陽蔡侍御元夕遲余燕集信宿賦謝

孤臣萬里客南荒明月連宵待舉觴不爲抱關

虛左席誰從倒屣見中郎  
綈袍一借青雲色  
劔重迴白日光  
自昔交情憐絕域  
躊躇杯酒在河梁

盤江驛舍阻雨寄門人汪惟一

天連益部常多雨  
路出盤江轉毒淫  
春早蟄龍蒸赤水  
夜深山鬼嘯青林  
殊方誰解詩篇苦  
萃髮逾愁瘴癘侵  
吹笛袁生應好在  
懷余堪和武溪吟

觀察郭公餞別貴陽西關

十年燕市結交驩  
萬里羈愁此日寬  
羣髮始從桐柱會  
綠楊如在玉河看  
山憐祖席青相向  
春戀綈袍雨不寒  
却望滇池殊不遠  
檄書莫惜慰加餐

過關索嶺醉後解嘲

昆明使者漢張騫  
六傳仍逢武帝年  
萬里向期車轍偏  
千山寧厭馬蹄穿  
銅標日月雙橫海  
鍊石西南一補天  
不腆彩毫猶五色  
銘成應許並燕然

青蘿館詩卷之三

青蘿館詩卷之五

國家圖書館, NATIONAL CENTRAL LIBRARY, TAIWAN, R.O.C.





青蘿館詩卷之六

吳興徐中行著

門人新都汪時元校刻

五言排律

正月十六夜同諸子過順甫宅得燈字

火樹連三市星橋映五陵  
鄴中七子賦漢苑九  
率燈桂暈光疑滅蓮壺漏漸增  
寒餘金掌露春  
上玉河冰浮白能中聖  
談玄得上乘  
越吟悲自  
遣燕石咲相矜御氣通  
丹禁邊烽斷白登更聞  
祠太乙鐘鼓夜相仍

抄夏從瑞金山行輿中作兼寄明卿

火方逢六月露冕歷千盤  
仄徑難容幘懸崖欲  
墮鞍人家藏洞壑鳥道出  
嶺岼寂寂長松嶺漕  
漕亂石灘古楂通岸險飛  
瀑濺雲寒野薜懷初  
服荒榛謝午飡歲時過薄  
秩山水咲微官石爛  
悲仍在河清俟轉難時違  
杯倦把老至鏡羞看  
浮世從推轂深謀在挂冠  
爾曹稱獨往吾意肯  
偏安兵火空皮骨江湖後  
羽翰佯狂惟舅倩任  
俠亦燕丹爲報扶搖侶相  
將九萬搏

送族姪徐雲卿任靈璧縣簿

弱冠入燕京長歌俠客行  
金羈千里駿錦席五  
侯鯖顧我頻投轄逢時欲  
請纓一官紆左尉三  
月賦東征王氣開原廟青  
山匝潁城試過淝水  
問小謝至今名

出越劔示王亮卿席上口占

兩夜蓮花匣床頭忽自鳴  
扣門逢俠客問姓即  
荆卿倏忽雙龍出蒼茫四  
座驚白虹天外落紫  
氣酒邊生裘馬心逾壯烽  
烟事未平臨岐欲把

贈吾意在橫行

送大梁李公轉東藩左轄八韻代作

賦別復梁園高秋鼓吹喧張旌臨北海馮軾下  
中原賜履東秦壯登封太嶽尊河山開日觀星  
斗挂天門闕里風堪問明堂跡尚存齊名慚李  
固對榻戀陳蕃湖月邀仙舫峯雲落酒樽誰憐  
虛左地長憶信陵恩

同張肖甫送廼兄張山人還蜀

兄弟金臺別依依玉樹柯鳴琴悽蜀調把酒醉  
燕歌曉騎停楊柳春衣換薜蘿回車赤岸近卧  
閣白雲多月度峨眉夜花飛錦水波著書藏小  
酉種藥蒲中阿風物三巴盡蓬蒿二仲過他時  
登海嶠莫惜示羊何

七言排律

黃河道中別吳生

賦別河梁思不禁愀然斜日變春陰艱危未盡  
秦庭哭放逐仍同楚澤吟風雨北來三輔暗雲  
霞南入九江深窮途豈礙垂天翼散地偏增玩

世心知已千秋高白雪論交四海失黃金相期  
後會從藜杖祇恐名山也陸沈

賦得貞石贈雲間吳比部十二韻

何來片石挺孤標閱盡滄桑不動搖五嶽寰中  
爭截業九峯江上讓岩堯補天已就千秋色障  
海曾回萬里潮碁置星辰分碧落鏡懸日月迤  
青霄甘嬰楚荆明投壁耻受秦鞭幻作橋古冶  
自堪成鐵劔它山猶可治瓊瑤芙蓉獨秀誰爭  
麗松栢相依也後凋漱齒清風高百代觸膚霖  
雨徧崇朝論交萬變心難轉比介三公勢不撓  
承柱明堂綿玉曆支機青漢挂氷綃竒聲賦擲  
天台動王氣書探禹穴遙審樂正逢吳季札并  
將擊拊和虞韶

奉送太宰楊公西還誦德述懷十九韻

誅蕩天門旭日升縱橫龍變與雲蒸時才五鹿  
名虛籍世業三鱣兆有憑啓事朝濡雙掌露齋  
心寒映九河水節宣北斗天喉舌總領文昌  
帝股肱抗議外廷推汲黯延賓東閣謝孫弘兩

朝扈 聖趨丹禁廿載臨戎老白登魚水明良  
方遇合滄桑歲月忽因仍挂冠鄒衍飛霜市廻  
馭文王避雨陵安得箏歌明謝傳欲從劒字問  
韓稜傾城供帳青霄浦入晉河山紫氣增顧命  
詎能忘玉几流言應自感金滕萬邦黎庶思重  
起 九廟神靈在中興田里本非 明主意風  
雷行見詔書微即看麟閣圖充國曾向龍門御  
李膺顧眄一朝投白璧蹉跎千里附青蠅匏瓜  
久繫翻相咲頑石猶存敢自矜拂袖五噫辭漢  
闕抽毫七發愧枚乘出爲小草元無益積似前  
新任見凌誰復黃金收駿骨且將華髮寄魚鬐  
五言絕句

活水池

池分襄漢水岸夾武陵花但得高陽侶寧須問  
習家

詠顧汝和舍人種桃

不言溫室樹却種武陵花豈是金門客偷桃出  
漢家

題顧汝和石鼎寮

雲英烹石鼎月色照冰壺何必金莖露能令肺  
病蘇

邛竹杖

仙人方竹杖遠道出臨邛挂壁風雲動還應欲  
化龍

七言絕句

燕臺感舊

北來鴻鴈已南飛滿眼風塵舊侶非欲向月明  
歌郢曲不禁霜露濕人衣

停舟溪上懷子相

夜闌星斗挂千峯吹笛江樓思萬重曲罷美人  
猶不見空懸明月照芙蓉

登霹靂巖遲宗少叅子相雷雨驟作

白日天開霹靂巖千山飛瀑挂松杉馮陵却喜  
東風急吹盡浮雲見客帆

梁園送青州馮公督學浙江二首

文韜朝發孝王臺錦席秋臨南斗開齊雅向聞

吳季子泱泱今覩大風來

五花爲馬繡爲袍攬轡江南興轉豪滄海濤聲  
迴坐嘯赤城霞色起揮毫

送子相

妙高峯上試登臨月色潮聲盡古今詞客豈須  
愁病肺中冷泉水更清心

送于鱗之邢州三首

趙地山河擁上京于今保障有長城停車襄子  
宮前問猶說當年國士名

東平俠客有劉生寶劍千金舊署名忽道明朝  
脫相贈夜深風雨匣中鳴

十年西省尚書郎此日新携刺史章明月一尊  
開北海春風千騎下東方

送許趙州兼訊李邢州

青春五馬下燕京自喜分符近李生雙壁千秋  
重入趙共看明月照連城

送元美二首

高秋獨上白登臺西北浮雲晝不開忽見千山

飛雪下驚傳漢使自天來

醉携長劔倚高秋忽見黃河天外流莫更臨風  
歌出塞九邊寒色不禁愁

同明卿惟敬登太白樓

醉携遷客上雲梯睥睨煙霄萬象低便欲乘風  
登日觀蒼茫海色使人迷

感舊二首

自別燕臺白日徂葦陽碣石總荒蕪獨留一片  
西山月猶照當年舊酒壚

北來鴻雁已南飛滿眼風塵舊侶非欲向良  
歌郢曲不禁霜露濕人衣

懷于鱗

黃河萬里接崑崙太華天開西極尊一自凌雲  
來賦客未論紫氣滿關門

征南鏡歌二首

誓師親上越王臺東望扶桑海色開鉦鼓三江  
殷地起鱉鼉萬里躡天來

橫海樓船大出師青山千里列旌旗會稽擬作



燕然石震澤今爲飲馬池

于鱗謝病濟南寄訊

白雲湖上萬山青  
日日茅堂醉復醒  
不是揚雄  
耽寂寞千秋誰見太玄經

寄荅汝南諸明府

景夷臺上白雲秋  
縣瓠城邊汝水流  
却憶諸君  
明月夜臨風清嘯滿南樓

寄贈侍御潘子良督學畿中二首

地雄燕趙舊多才  
賢俊爭看日下來

成駿馬黃金何用築高臺

蹀躞花驄走北平  
鬱蔥佳氣傍神京  
龍門復見  
三千士虎旅曾監十二營

贈總制汝南喻公破胡鏡歌二首

驃騎乘秋出武威  
經旬三見捷書飛  
侍臣上壽  
歌朱鷺諸將承恩拜錦衣

邊聲動地陣雲黃  
萬騎馮陵蹴大荒  
落日忽聞  
鐃吹入轅門生致兩賢王

戲詠盆中品字蓮二首

三婦豔風流不數六郎嬌  
花開品字競妖嬈竝倚金塘舞翠翹惆悵忽思

笑看齒齶出盆池竝蒂三花宛宛垂却似太真  
初浴罷雙携秦虢鏡中窺

寄張亮卿林彥仲游明仲趙以忠四子

升堂門客總應劉托乘西園幾度游飛蓋祇今  
明月夜芙蓉還似去年秋

懷于鱗

青天太華倚嶺岼白日黃河萬里看一自著書

西度後關門紫氣至今寒

懷明卿

萬仞匡廬散錦屏千尋瀑布挂青冥自從騎鹿  
雲中去何處逢人間歲星

寄在明

一自悲歌易水旁故人風雨散瀟湘從今莫灑  
千秋淚只恐重飛六月霜

寄齊相許殿卿時于鱗病免濟上

投荒猶得賜環恩授簡王門道亦尊更值相如

初病免論文數過茂陵園

送丁參軍之楚幕二首

幕府高臨七澤開  
參軍爭喜孟嘉來  
時清久罷征蠻檄  
秋至重登落帽臺

武昌楊柳颯高秋  
楚練如霜映上游  
聞道庾公今在鎮  
好乘明月嘯南樓

奉和黃公金溪詠

芙蓉峯

霞標秀出海雲重  
空曲煙浮翡翠濃  
最愛金溪

秋月夜天開  
明鏡浸芙蓉

文筆峯

秀拔瓊林迥不群  
千尋霜穎插青雲  
午風吹破江淹夢  
散作雲霞五色文

錦屏峯

蹙沓匡廬九疊屏  
天風吹度九江青  
朝來忽挂飛霞色  
却似群仙會幔亭

曲溪

曲曲清流隱竹林  
逶迤更比武陵深  
春來岸岸

花相似縱有漁郎何處尋

贈蘇進士歌者新春

春雲輕度鬱輪袍雪淨花宮玉樹高更道掌中  
能妙舞曾經醉殺五陵豪

華陽明月曲

嗟呼明月下高峰秋滿瓊樓十二重只尺太清  
殊可問茅君爲我借飛龍

送吳明卿

天外音書久不聞眼前朋好又離群今宵斗酒

還燕市明月孤帆是楚雲

廣陵史德初訪余山中

漂零誰識史王孫曾散千金報 主恩此日到  
余茗水上白雲秋色可堪論

挽中丞王丈三首

三握兵符漢重臣蒼茫無復畫麒麟風雷不見  
將軍樹愁殺延陵挂劍人

烽火甘泉獨請纓君王親問亞夫名榆關自失  
單于壘一夜霜彫細柳營

頻年力盡戍桑乾  
帷幄紛紛日轉難  
一自縞衣過易水  
瀟瀟風色至今寒

送司馬蔡公赴京四首

漢家閭闔倚天開  
劍履乘秋入上台  
托乘諸侯千騎出  
前驅中岳萬靈來

萬騎憑陵走朔風  
千旗肅穆建章宮  
寄聲胡馬休南向  
頗牧于今在禁中

樓船天上出黃河  
南指燕山氣色多  
漢月九關飛羽檄  
卿雲三殿進銜歌

十八終軍誓請纓  
蹉跎華髮入承明  
誇胡已著長楊賦  
衛漢重開細柳營

秋日建溪懷明卿

倚棹秋風問幔亭  
滄江落日萬山青  
獨看廬嶽雲千疊  
豈是狂生醉未醒

哭光祿汝所二首

十載曾同洛下遊  
惠連年少更風流  
諸兄縱有池塘夢  
玉樹蕭蕭祗自愁

美人今已不同時  
開篋重看贈我詩  
若道江南

無舊好豈應天上有新知

爽臺送別朱生

湖門俠客馭風來十日狂歌醉爽臺歸去武夷  
秋正好萬山明月片帆開

六言詩

宜城贈包護軍

自叙信陵國士曾事田光先生擊劔兼工長短  
讀書獨喜縱橫千金結客垂盡百戰封侯未成  
羽獵休誇雲夢商歌且醉宜城

再贈包護軍二首

海外爭誇超距行間獨自浮沈肝膽皎如白日  
功名羞問黃金  
說劍雄風忽起銜杯俠氣逾振賭命聊憑一擲  
學敵寧止萬人

青蘿館詩卷之六終